

Cuira resta in ferm staziunament

La regenza beneventa il nov concept da staziunament da l'armada

DA MARTIN CABALZAR

■ **Il militar mantegn probabel las plazzas d'armas a Cuira, S-chanf, Valragn e Luziensteig, la piazza militar a Breil vegn dentant serrada. Plinavant vegn il commando da la brigada mecanisada 11 staziunada en l'avegnir a Cuira. Tut en tut beneventa la regenza grischuna il nov concept da staziunament da l'armada.** Quai ha il schef dal departament da giustia, segirezza e sanadad, cusseglier guvernativ *Christian Rathgeb*, accentà ier a la conferenza da medias a Cuira. Tenor Rathgeb preveda il sboz per il concept per il staziunament futur da l'armada ch'il cussegl federal ha tramess en consultaziun la fin da november da terminar l'utilisaziun da differents plazzas da tir che na vegnevan betg pli u sporadicamain occupadas ils ultims onns. Medemamain duia vegnir desistì en l'avegnir dal champ da truppas a Breil en Surselva. En collavuraziun cun la vischnanca da Breil èn ins uss a la tschertga d'ina nova utilisaziun per ils edifizis prest novs a Breil. Primarmain vegnia in adiever turistic en dumonda. Il chantun veglia sustegnair la vischnanca tar la realisaziun d'in tal project, ha sincerà cusseglier guvernativ *Christian Rathgeb*.

En sia posiziun per mauns dal Departament federal da defensiun, protecciun e sport haja la regenza menziunà ch'il sboz tegnia quint dals interess dals chantuns e da las vischnancas, era sch'i saja da deplorar ch'il champ da truppas a Breil en Surselva vegnia serrà.

Investiziuns da 130 milliuns en il decurs dals proxims 4 onns

Christian Rathgeb na cuschenta betg ch'il chantun Grischun saja stà pertutgà ils ultims 20 onns surproporzionadamain da las mesiras da reducciun da l'armada. Tut en tut sajan 140 plazzas vegnidadas stritgadas en spezial en connex cun la serrada da l'arsenal federal e dals lavuratori da mantegniment a Cuira. Tras quai che las plazzas d'armas en il chantun vegnan utilisadas vinavant na

vegnevan betg mo segiradas las 150 plazzas da lavur restantas da l'armada en il Grischun. Grazia a las investiziuns previstas da 130 milliuns entaifer ils proxims 4 onns profitia era l'economia publica en las regiuns pertutgadas.

«Enten fixar ils lieus da staziunaments futurs haja il Departament federal da militar era tegnì quint dal fatg ch'il chantun Grischun è in partenari fidà da l'armada e ch'el dispona da lieus spezialmain adattads per acziuns da l'armada», ha constatà *Christian Rathgeb*. En quest connex stoppia era vegnir menziunà ch'il departament respunsabel ha era contactà las vischnancas da staziunament. Legraivlamain sustegnian era quellas il futur concept da staziunament. En sia posiziun vers Berna ha la regenza grischuna er esprimì il giavisch da la citad da Cuira e dal chantun ch'i dettia ina discussiun averta cun ils represchentants dad *Armasuisse* e da l'armada avant il cumenzament da la planisaziun per sanar la caserna a Cuira. Quai duai garantir in proceder coordinà tranter tut las personas involvidas», ha punctuà *Christian Rathgeb*.

Brigada mecanisada 11 enstagl brigada da muntogna 12

Tras la schliaziun da la brigada d'infanteria da muntogna 12 prevedida en il rom da l'ulteriur svilup da l'armada vegn era schlià ses commando a Cuira. «La regenza deplorescha ch'il Departament federal da militar ha decidì da schliar la brigada d'infanteria da muntogna 12, uschia che era ses commando a Cuira vegn abolì», accentuescha il minister da militar grischun. Tras transferir il commando da la brigada mecanisada 11 da *Winterthur* a Cuira vegnia tegnì quint dal giavisch da la regenza e d'ina gronda part da la populaziun da domiciliar er vinavant il commando d'ina gronda unitad militar en il Grischun.

Tant *Christian Rathgeb* sco il parsura da la citad da Cuira *Urs Marti* han punctuà ch'i fissi stà nunchapibel sche Cuira avess stuì acceptar la canera da tir senza ch'ins avess dentant er in comman-

do correspondent. Il staziunament dal commando da la brigada mecanisada 11 haja era – tant ord vista militar sco civila – avantatgs considerabels en connex cun la realisaziun dal Forum economic mundial a Tavau e cun il sustegn tar catastrofes da la natira. Sco quai che la regenza explitgescha en sia posiziun duai Cuira en mintga cas vegnir mantegnì er en l'avegnir sco lieu da staziunament per l'armada e quai tant sco piazza d'armas sco era sco lieu da commando. En quest connex stoppia era vegnir resguardà il fatg ch'il dumber d'indrizz d'infrastructura, da commandos e da plazzas d'armas saja en il Grischun sut la media cumpareglià cun auters chantuns cun ina topografia militar cumparegliabla, concluda *Christian Rathgeb*.

Bleras schanzas per Cuira

Il parsura da la citad da Cuira *Urs Marti* vesa ch'il nov concept da staziunament da l'armada enserra grondas schanzas per la citad da Cuira. I na sa tracta betg mo da radund 60 plazzas da lavur impurtantas ed attractivas, anzi er ulteriurs secturs economics profitian da la svieuta creschenta da la schuldada. Ins quintia che scadin schuldà contribueschia 50 francs a di a la creaziun da valor da la regiun. Ina gronda part da quai gaja en la gastronomia ed en il mastern sco er en il commerzi. Per mategnair Cuira vinavant sco lieu da staziunament pledian era las investiziuns gia fatgas e previstas en la caserna ed al «*Rosboden*».

Schuldads ch'abolvian a Cuira ed en Grischun la recruta ed ils curs da repetiziun returnian pli trard adina puspè en il Grischun sco turistichers, è *Rathgeb* persuadì. Cun il staziunament militar a Cuira prestia la citad er ina contribuziun a favur da la segirezza da l'entira Svizra. Entaifer curt temp saja l'armada pronta da vegnir en acziun tar catastrofes da la natira, tar la tgira ed il provediment da personas en cas urgents u sco rinforzament da la polizia tar arranschaments pli gronds.



Cusseglier guvernativ *Christian Rathgeb* (dretg) ed il president da la citad da Cuira *Urs Marti* (san.) èn satisfatgs dal nov concept da staziunament da l'armada.